



Moobayliya

Leveled



Wolayttatto Doona



Ha gujo nabbabo maxaafay Yuu Essi Eyidiyappe (USAID) beettida miishshaa maaduwan Seev Ze Chiddirenee (Save the Children), Luxettaa Moconayne Tohossa Dalgga Manttiya Luxettaa Beeroy issippe hashetin giigidi attamettidaagaa.

2009 M.L.



USAID
FROM THE AMERICAN PEOPLE



Save the Children



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.

For more info please refer: <https://creativecommons.org/licenses/>




Moobayliya

Kifilee 4

Saaminttay 23

Leveled



Luxissiyageetussi Kaaletuwa

Naati nabbabuwa doommanaappe kase misiliyanne huuphe yohuwa
bessidi nabbaboy odiyoba malana mala oychchite. Nabbabi simmidi
wurssettan de'iya oyshata zaarana mala oottite.

Nabbabuwappe kasetiya Mali be'o Oyshaa

Huuphe yohuwanne koohuwa bollan de'iya
misiliya xeelliyo wode ha nabbaboy ay odanaba
milatii?



Shemppuwa 1: Mobayliya Go'aa

Moobaylee asay asaara sinttan gayttennan cenggurssa xalaalan gayttana oottiya zammaana asa asaara gattiya miishsha. Issi asi moobayliyan haasayiyobi ayfee liphennan awukko deren de'iya asa hayttawu gakkees. Cenggurssay carckkuwa giddoora kanttidi biyo wodenne simmi yiidi qassi nu hayttan geliyo wode beettiyabi baa. Deriya xoqqatettay, mittaynne maatay cenggurssay aadhdhenna mala oottana danddayenna.

Laggetanne yelidaageeta sinttan gayttenan
eta payyatettaa, oosuwa, luxettaa, duussaabaa
oychchanawu injje oge. Dumma dumma allaalliyara
so asaappe haakkidi hara dere biida asati galla galla
bantta soo asaa oychchana danddayoosona.

Hegaa bollankka giyan kattatanne dumma
dummabata bayzziyo gatiya soon uttidi
oychchidi erana danddayettees. Zal"anchchati
bayzziyobaa giya beennan soon uttidi gatiya erana
danddayoosona. Kessiyogaanne kessennaagaa sooni
uttidi shaakkidi giyaa kessana danddayoosona. Kase
kase daafuridi giyaa gatti makkin gatee kessennaagaa
gidana danddayees. Giyaa gattin kessennaba gidikko
daro wolqqaa gussidi soo guyye zaaroosona woykko
kessenna gatiyan coo bayzzoosona.

Issi giya xalaala gidennan dumma dumma giyatun
de'ia gatiya sooni uttidi erana danddayoosona.
Yaatidi he kessiya sohuwa efidi bayzzana woykko
shammana danddayoosona. Hegee qassi ba gadeppe

demmo ayfiya bessiya gatiya demmidi bayzzana mala naqaashaa demmanawu maaddees. Ambban gidin ganddan asay zeridi demmo kattaa hanenna gatiyan bayzzenna mala maaddees. Dumma dumma sohuwan de'iya hiraysiya gatiyakka erana danddayoosona.

Moobaylee maaddiyoy asay asaara gayttana malanne giyaa gatiya erana xalaalawu gidenna. Galla galla biittan haniyabaa naqaashaa woykko oduwakka demmanawu keehi maaddees. Asay kase eraadooniya ezggidi demmiyo naqaashaa moobayliyanikka demmana danddayees. Moobayliyan cora naqaashaa immiya eqotati de'oosona. Hegeetuppe gamma naqaashaa immiya eqotaa dooridi ezggana danddayeettees.

Moobayliyan yettaakka ezggana danddayeettees. Asay dumma dumma shemppiyo wodiyan woykko adussa sohuwa barkka biyo wode moobayliya gidдон de'iya yettaa ezggiiddi baana danddayettees.

Teeppiyan kaasetiya yeggidi ezggiyo yettaa ha'i moobyliyan ezggana danddayettees.

Teeppiyan ezggyaba gidikko qaaxxennan issi sohuwan ezggana koshshees. Teeppiya nunaara ekkidi ubba sohuwa baana danddayokko. Soonni pe'iyo wode uttidi ezgganawu teeppee keehi maaddana danddayees. Moobaylee qassi sooni gidin karen nu doso sohuwa biiddi ezggana danddayettees. Hegaadankka eraadoniyakka nunaara ekkidi yuuyyana danddayokko. Yaaniyo gishshawu ezggana koyyiyo oduwa wodee aadhdhennan moobayliyan ezggana danddayettees.

Moobayliyan footuwakka denttana danddayoos. Moobayliyan so asaa woykko issi asi bari huuphiya denttana danddayees. Moobayliyan duma duma lo'iya sohota woykko mehetakka footuwa denttana danddayettees. Leemisuwawu Ajjoora soossuwa be'ana biida asi footuwa denttidi hara be'ibeenna asa bessana danddayees.

Moobaylee xiskkuwappe denttana malakka go'ettana danddayoos. Issi guuran denddana koyyiya asi he saatiya moobayliyan kunttikko he kunttido saatee gakkiyo wode moobaylee waasuwa doommees. He wodiyan xiskkida asi denddi aggees. Yaatidi baana koyiyo sohuwa wodiya gakkana danddayettees. Xiskkida asi denttiya asi baa giidi un"ettennan shemppana danddayees.

Issi issi moobayleti xomppiyakka immoosona. Xuma heeran woykko xomppee soon xaykko moobayliya xomppana dannddayettees. Gidikkone eesuwara gorddenna mala ubbatoo xomppana koshshenna. Ha qommoora qonccidaageeti amarida moobayliya go"ata. Hagan qonccibeenna daro hara maadoti de'iyogee erettees. Kaallidi qassi moobaylee go'ettiyo wode akeekana koshshiyobata qanttana qonccissana.



Shemppuwa 2: Ezggiyo Ogiya

Moobayliyan oduwa, diraamaa, yettaa issi uri barkka gidin issippe siyana danddayettees. Issi uri moobayliyan yettaa gidin oduwa siyana koyiyo wode naa"u ogiyan ezggana danddayees. Koyroogee oossinne siyettennan ba xalaalawu siyettana mala oottidi ezggana danddayettees.

Hegaadan ezgganawu maaddiya wodoroy moobayliyanne hayttaa gattees. Ha wodoroy moobayliya giddoppe cenggurssaa xunxxidi hara asa sissennan issi asa hayttawu gattees. Yaaniyo wode matan uttida asi siyennan issi asa xalaalay siyana danddayees. Nuuni koyidobaa laammi laammidi ezggana danddayeettees. Ha ogiyan ezggiyogee corabawu maaddees.

He maaduwappe issoy hara asi nuuni ezggyobaa siyana koyenna wodiyan go'etteettes. Matan de'iya asi ayba cenggurssinne xoqqidi siyettenna mala koyana danddayees. Yaaniyo gishshawu issi asi ba xalaalawu siyettana mala oottiyogee keehippe koshshiyaba.


Issi issi asay kaame giddon, ogiyan, hooteeliyan moobayliya xoqqu oottidi waasissiddi ezggees. Matan de'iya asi koyyii koyyennee giyobikka baa. Cenggurssaa xoqqu oottidi koyoogaadan ezggoosona. Hegee qassi hara asaa shemppuwa diggana danddayees. Yaaniyo gishshawu moobayliya dooyidi ezggyo yettaa gidin oduwa akeekidi dooyana koshshees. Hegaa bollankka nu dooyiyo heerankka cenggurssay kiyenna mala koyettiya heera gidana danddayees.

Moobayliyan cenggurssaa xoqqu oottidi ezggyo wodee baawa giyogaa gidennaagaa akeekana koshshees. Matan de'iya asay ezgana koyiyaba gidikko ezggyo wodoruwa shoddichchidi cenggurssaa

xoqqu oottana danddayettees. Issippe erettiya asay
issippe gididi moobayliyan aadhdhiya pirogiraamiya
ezggana danddayoosona. Hegge hanana koshshiyoy
qassi ubbay maayettiyo wode gidikko lo"o.

Hegaa gishshawu moobayliyan duma dummabata
ezggiyo wode ooni oyichii giidi coo dooyana
koshshenna. Hara matan de'iya asi siyanawu
koshshaa bessikko xoqqu oottidi dooyana
danddayettees. Ixxikko issi asi barkka ezggana
koshshees.

Moobaylee de'iyoo ubbay kessidi yettaanne oduwa
cenggurssaa xoqqu oottidi dooyikko ezggiyay
xayigees. Duma duma asawu qassi duma
koshshay de'ees. Yaaniyo gishshawu moobayliya
go'ettiyo wode matan de'iya asaa balbbuqiyanaa
balbuqikkinaa giidi bana barkka oyichana
koshshees. “Ta barkka ezggo woykko cenggurssaa
xoqqu oottada dooyoo” giidi heeran de'iya hanotaa
akeekana koshshees.



Shemppuwa 3: Naagettiyobata


Moobayliya wodoruwa hayttan naaqqidi ezggiya asay naagettana koshshiyobay de'ees. Hegeekka he wodoruwa haytta wottidi adussa wodiya ezggiyogee aybanne kaalettiyaba milatenna. Hegaa gishshawu daro naati hayttan gidдон naaqqidi yettaa woykko harabaa ezggiiddi pee'oosona.

Hegge qassi hayttaa sahuwa kaalettana danddayees. Ezggiyobaa cenggurssay keehi xoqqikko nu hayttaakka iita qohana danddayees. Hegge qassi gam"iiddi gam"iiddi siyenna xekkaa gattana danddayees. Hegaadan oottiya asaa nu heeran darota be'eettees. Hegaa gishshawu nu hayttay

sakettenna mala muletoo hayttan surqqidi pee'ana koshshenna.

Hara naagettana koshshiyabay qassi issi asi siyido wodoruwa hara asaara laamerettiyogaa. Hegge qassi issi asa bollan de'iya hayttaa harggee hara asakko aadhdhana danddayees. Issi asan de'iya bakteeree hara asawu laa'anawu oge gidees giyogaa. Hegge qassi nu hayttay harggana mala oottana danddayees.

Yaaniyo gishshawu ezggiyo wodoruwa hayttan surqqidi moobayliyappe ezggiyo wode akeekana koshshees. Hegge nu hayttay paxenna xekkaa gakkanaashin harggissana danddayiyogaa erana koshhsees. Go'ettana koyikkokka cenggurssaa darissana bessenna. Hegaadankka ezggiyo wodoruwa hara asaara koxkana koshshenna. Ha wodoruwa xeeran de'iyageeta haytta giddo loyttidi naaqqanakka bessenna.



Shemppuwa 4: Gattiyo Qohuwa

Ha shemppuwan qassi moobayliyara gayttidaban gakkiya metota qonccissana. Ha metotuppe issoy kaamiya danoy gakkana mala oottana danddayiyogaa. Laaggiyageeti laaggiiddi haasayissikko kaamiya loyttidi laaggana danddayokkona. Haasayiyo wode gofaa wudiyoy he haasayiyobaanappe attin kaaiya laaggiyogan gidana danddayenna.

Daro kaamiya danoy laaggiyageeti laaggiiddi moobayliya haasayissiyogaappe gakkees. Kaammiya laaggiyogee hemettiya asaa, ogiya, malaatatanne ogiyan de'iya xomppeta xeellidi akeekan laggana mala koyees. Asay ogiya pinnana koyyikko kaamiya laaggiya asi akeekan kaamiya essidi aattana koshshsees.

Laaggiyageeti moobayliyan haasayiiddi de'ikko hegaa polana danddayokkona. Hegaa gishshawu asaanne miishshaa bollan iita danwua gattana danddayoosona. Kaamiya danoy gakkana danddayiyo wodiya oonne erenna. Naagettennan xaykko danoy ay saatiyaninne wodiyan gakkidi daro asaanne miishhshaa wurssana danddayees.

Kaamiya laaggiya asi haasayissana koyiyo wode ogiya gaxa kaamiya efi essidi haasayana koshshees. Gaxan essiyo wodekka injjetiyogaa loyttidi akeekana koshshees. Hegee xayikko hara qofettibeenna danuwa gattana qaaday keehi daro. Moobayliya suure go'ettikko koyro shemppuwan qonccidabatuppe aaruwa maaddana danddayees. Ixxikko qassi akeekennan iita kaamiya danuwa gattanawukka gaaso gidana danddayees.

Hara moobayliyara gayttidi ha''i wode denddiyabi oottiyo osoy qanxxettana mala oottiyogaa. Issi issi luxissiya asati luxissishin moobaylee xeesikko

luxissiyogaa aggidi haasayaa doommosona.
Qanxxennan adussa wodiya haasayoosona.
Luxiyageetikka awudeppe awdue simmii giidi uttidi
naagishin batetta saatee wuriigees.

Nabbabanawu maxaafa keetta gelikkokka moobayliya
xeessay wudidi nabbabenna mala oottees.

Ubba sohuwan uttida asaa moobaylee xeesiyo
wode nabbabana danddayettenna. Issi issi asay
haasayissanawu soonne kare kiyishin maxaafaa
keettan nabbabiya asay ubbay balbbuqettes.
Hegge naati woppu giidi nabbabenna mala oottees.
Nabbabiyo wodekka wudenna mala oottees.

Hegaadankka shiiquwa kaalettiya asi moobaylee
xeesikko bantta qofaa he sohuwan essidi haasayawu
denddoosona. Hegge qassi wodee coo hada xayana
malanne qofay laalettana mala oottees. Kaalliya
shemppuwan hageeta milatiya metoti merettenna
mala moobayliya go'ettiya asay ubbay oottana
bessiyobaa qanttana qonccissana.



Shemppuwa 5: Go'ettiyo Ogiya

Kaamiya laaggiya asi laaggiiddi moobayliya
haasayissana koshshennna. Moobayliya
haasayissanawu koyiyo wode ogiya doonaakko kiiyidi
kaamiya injjetiya sohuwan essidi haasayissana
koshshees. Taassi meezeenne eray de'ees giidi
demmo sohuwan ubban kaamiya ogiyan moobayliyan
haasayana koshshennna. Gaasoykka danoy awaara
gakkanaakko erettenna gishshawu.

Hara moobayliya go'ettana bessiy ogee waassenna mala sirphphi ootti wottiyogaa. Ha ogee nuussi asi shociyo wode xeeseesishin cenggurssay siyettenna. Nuussi shociya asakka erana danddayettees. Hagee luxissiy wodenne shiiquwa shaakkiyo wode go'ettanawu lo'o oge. Moobayliya waasuwappe denddaagan luxettayne shiiqoy balbbuqettenna giyogaa. He shocida asakka luxettaa woykko shiiquwa wurssiyo wode zaari shocidi woppaan gayttana danddayettees.

Maxaafa keettan nabbabiyo wodekka moobayliya cenggureннаadan sirphphi oottana koshshees. Shocettiya payduwa be'idi hara nabbabiya asa balbbuqennan kare kiyidi injjetiya sohuwan eqqidi haasayana bessees. Asi nuussi shoccoogaa qassi cenggurssaa xayssidi moobaylee waassennan kokkoranaadan oottana danddayettees.

Yaaniyo gishshawu moobayliya duma duma
sohotun leemisuwawu luxishin, shiiquwaninne
maxaafa keettaaninne hegeeta milatiya sohota biyo
wode akeekana koshshees. Moobaylee sirphphi gi
uttidee woykko xeesikko asaa balbbuqanawu de'ii
giidi A hanotaa akeekana koshshees. Ubbatookka
xeellidi sirphphi woykko kokkoranaadan oottidi
suurenne gamma ogiyan go'ettana danddayettees.
Hegge qassi awudekka dogettana bessennabaa
gidiyogaa asi ubbi erana bessees.

Hara naagettana koshshiyabay qassi moobayliya
ezggiyo wodoruwan siyiyo wode cenggurssaa
xoqqissana koshshennaagaa. Cenggurssaa keehi
xoqqu oottikko mobayilee nu haytta qohana
danddayiyo qaaday keehi daro. Ha ezggiyo miishshaa
qassi laametti laametti hara asaarakka go'ettana
koshshenna. Hegge xayikko issi asa haytta gidдон
de'iya baktteeree he wodoruwara hara asakko
aadhdhana danddayees.

Xaaxi waaxiyo wode moobaylee asawu ubbawu keehi daro maaduwa immees. Asay moobayliyan issoy issuwara haaho sohuwan uttidi metoy baynnan gayttana danddayees. Giyan de'iya zal"aiya hanotaa eranawu moobaylee keehi maaddees. Hegaa bollankka asay yettaa, diraamaa, ispporttiyanne dumma dumma alamiyan hanida oduwa moobayliyappe demmana danddayettes.

Hagaa keena cora maaduwa immiya moobayliya bessiya ogiyan suure go'etennaba gidikko qohuwakka gattana danddayees. Kaamiya laaggiiddi mobayliya haasayissikko kaamiya danuwan gattana danddayees. Osuwa, luxettaanne shiiquwa balbbuqana danddayiyo qaadaykka keehi daro. Hegaa gishshawu moobayliya bessiya sohuwan he sohuwassi bessiyagaadan go'ettana koshshees.

Meeziya

A. Kaalliya oyshata nabbabuwana amppidi zaara.

1. Moobaylee aybawu maaddii?
2. Moobyliyan yettaanne duma dummabata ayba ogiyan ezggana danddayiyo?
3. Ezggiyo wodoruwa go'ettiyo wode naagettana koshshiyobay aybee?
4. Moobayliya maxaafa keettaaninne luxetta wodiyan waati go'ettana danddayettii?
5. Moobaylee gaaso gidana danddayiyo danay aybee? Aybissi?
6. Moobayliya ay ogiyan go'ettikko lo'oo?

B. Kaalliya oyshata nabbabuwannin ne buzo meeziyan amppada zaara.

1. Intte heeran nabbabuwana qonccidda moobayliya go'ettiyo ogetuppe intte be'idobi de'ii? Gamma oge gaada qoppiyogee awugee?
2. Intte eriyo hara moobayliya go'ay de'ikko oda.

